

DARI SEBULAN KE SEBULAN

Senator wanita yang tunggal Cik Aishah Ghani

menegur bahawa buku-buku pelajaran-pelajaran agama di sekolah rendah dikatakannya “tidak sesuai”. Katanya “kanak-kanak yang berusia sembilan tahun dalam darjah tiga ini sudah diajar ilmu fikah. Perkara fikah ini **lebih sesuai kalau diajar kepada wanita-wanita yang sudah bersuami** kerana hukum-hukum di dalamnya lebih banyak mengenai seks.

“Pihak ibu bapa di rumah adalah menjaga supaya anak-anak kecil serupa ini jangan mengetahui soal-soal seks. Tetapi di sekolah-sekolah mereka diajar soal-soal seperti ini. Bila mereka pulang ke rumah mereka mulailah bertanya mengenai perkara-perkara yang diajarkan kepada mereka itu”, sejalan kata Cik Aishah Ghani.

Khabarnya ia menunjukkan di dewan itu buku pelajaran agama yang ditegurnya itu.

Pelajaran agama kepada wanita-wanita yang berumur 9 tahun adalah wajib (fardu ain) yang mesti diajarkan. Persoalan haid, bersuci dan seumpamanya wajib diajarkan kepada mereka, kerana apabila sahaja ia baligh maka mestilah ia mengetahui keadaan dirinya dan cara-cara bersuci. Kalau ditunggu sudah kahwin atau sudah layak bersuami maka betapakah halnya dalam masa ia belum bersuami itu tidak mengetahui keadaan dirinya, di antara suci dan tidak suci? Dengan sebab malu-malu mengajar inilah banyak didapati sehingga ada dua tiga anak, mandi hadas pun tak tahu – apalagi mengkjinya lebih mendalam.

Untuk mengatasinya, tentunya cara buku untuk kanak-kanak ini bolehlah disusun dengan sebegini rupa dan bertingkat-tingkat. Tetapi tentang kewajipan mengajar, mestilah diteruskan supaya perempuan-perempuan yang membawa bibit itu tahu akan kesuciannya. Kalau ia tidak tahu – akibatnya keturunannya “tidak sempurna”. Ada fikiran yang patut disedari oleh pemimpin-pemimpin, tatkala hendak bercakap

mengenai perkara yang berkaitan agama tanyalah dahulu kepada ahlinya, atau sekurang-kurangnya pinta fikiran ahlinya supaya tidak kelak berlaku tuduhan: “cuba hendak menghapuskan perkara yang wajib dipelajari di dalam agama”.

* * *

Perkara angka perceraian di Kelantan dan di beberapa tempat adalah menjadi matlamat untuk mencatat sebab-sebabnya kemudahan perceraian yang berlaku di dalam kalangan orang-orang Islam. Sebenarnya banyak perceraian itu tidaklah boleh ditumpukan sebabnya kerana salahnya perceraian dan hak-hak perceraian tetapi mustahak dibuat penyata atau penyiasatan yang lengkap, kalau hendak mencari ikhtiar mengurangkan perceraian. Umpamanya, di setengah-setengah tempat, telah teradat kepada seseorang wanita, kalau hanya pernah bersuami satu sahaja jadi kehinaan. Ia berasa megah kalau dalam masa hidupnya telah berkahwin lima enam ataupun sepuluh kali – tandanya sebagai “wanita yang laku”. Juga, kalau hendak mencari ikhtiar mengurangkan perceraian, janganlah hendaknya melanggar batas-batas atau kelulusan yang dibenarkan syarak atau bertentangan dengan syarak sebab kalau ini dibuat dan difahami umat Islam akibatnya mereka terasa bahawa agama mereka akan diperkosa. Padahnya tentunya buruk benar! Buatlah umpamanya peraturan-peraturan yang tidak bertentangan dengan agama atau ikut sahaja hukum agama dengan mengadakan hukuman-hukumannya tentang diberatkan nafkah anak dan nafkah idah. Dengan cara ini yang membuat cerai sewenang-wenang tidak berani dan berfikir – sedang ia tidak bertentangan dengan ajaran agama.

* * *

Dalam memperkatakan banyaknya perceraian, maka ikhtiar yang sebaik-baiknya mengurangkannya ialah mengadakan kursus rumah tangga. Kursus ini bagi orang-orang Barat sememangnya diadakan dan sangat-sangat perlu. Cara-cara melayan suami

mesti dipelajari untuk menjaga perasaan supaya suami lekat kasih sayangnya kepada isteri. Biasanya seorang suami akan betah di rumahnya kalau mendapat sambutan dan layanan yang baik, tetapi suami akan tidak betah di rumah kalau isteri tak boleh salah sedikit terus diboikot – dan isteri terus-menerus meminta dipujuk sahaja sehingga mengadakan permintaan-permintaan yang tidak terpikul oleh suami. Kaum ibu UMNO mustahak mengadakan kursus-kursus rumah tangga ini sekiranya mereka ingin kurang berpoligami dan kurang perceraian. Kursusnya tidak hanya kepada masak-memasak sahaja, tetapi membela pelihara suami.

* * *

Senator Ungku Mohsin di dalam selarannya kepada Indonesia, telah menyebut supaya kerajaan memerhatikan dengan saksama tentang peluasan siaran-siaran Radio Malaya supaya dapat didengar meliputi seluruh kepulauan Nusantara (Indonesia seluruhnya) supaya jangan rakyat Indonesia diracuni oleh golongan-golongan yang sengaja memburuk-burukan Malaya.

Seruan Ungku Mohsin ini patut disegerakan – ini lebih perlu lagi daripada usaha kerajaan menyegearkan televisi. Tidak dapat disembunyikan lagi bahawa pendengar-pendengar Radio Indonesia sendiri – selain daripada Pulau Jawa lebih gemar mendengar Radio Malaya daripada mendengar Radio Indonesia. Selain daripada itu siaran yang luas itu sangat berguna sebagai suatu siaran penerangan kepada hakikat yang sebenar daripada perbuatan salah raya pemimpin-pemimpin ala Sukarno tatkala membidas sesuatu perkara dengan tidak usul periksa.

Dr. Burhanuddin, di dalam ucapannya membuka Dewan Ulama PAS mengingatkan bahawa keadaan yang sudah menjadi contoh dan ikutan bagi dewan-dewan lain dalam PAS itu tidak berjalan dengan teratur, maka tak usahlah diharap Dewan Pemuda dan Muslimat akan berjalan dengan baik dan teratur, benar apa yang dikatakan Dr. itu.

Tetapi yang sebaik-baiknya ialah bukannya sahaja pihak ulama PAS yang minta untuk bekerja lebih rapi tetapi

mustahak benar pula diingatkan sebahagian daripada pemimpin-pemimpin PAS sendiri supaya berakhhlak dengan akhlak Islam. Turut kata dan seruannya serta perangainya hendaklah berperangai Islam. Ini sangat mustahak kerana nampaknya ada sebahagiannya “yang lupa daratan” dan menjauahkan akhlak Islam kerana sudah sejuk duduk di kerusi empuk.

Ke bawah pula, patut dicontohkan kepada pemuda-pemuda tentang harga ulama supaya jangan semua kesalahan itu dihumbangkan ke atas ulama tanggungjawabnya. Biasakan kepada semua anggota PAS perasaan bertanggungjawab di atas tiap-tiap kejadian – tidak menyalahkan orang lain.

* * *

Di Dewan Pemuda PAS, menerusi A. Abdul Samad Ahmad telah membawa usul mengenai Brunei di dalam Persidangan Agung PAS dengan katanya:

“Kita dukacita bahawa tentera-tentera British di Brunei terus-menerus menindas rakyat Brunei.

“Kita tidak ingin melihat rakyat Brunei yang terdiri dari orang-orang Melayu itu terus-menerus dibunuhi oleh tentera-tentera British.

“Tindakan tentera-tentera British ini merupakan suatu kezaliman terhadap rakyat Brunei. Pemberontakan di sana adalah suatu pemberontakan yang halal di sisi mahkamah di mana-mana juga.

“Pemberontakan itu bertujuan membebaskan negeri mereka dari penjajahan,” katanya.

Ada orang yang mengatakan suara ini seakan-akan suara Azhari. Parti Rakyat Brunei telah memenangi pilihanraya tetapi Azhari maukan berdaerah dan maukan wilayah Sabah dan Sarawak ke dalam “sakunya”. British di sana diminta oleh Sultan – mengapa Sultan tidak dibidas?

Apakah ini tidak menunjukkan adanya bayangan-bayangan perkaitan “pemimpin-pemimpin” PAS yang berasal dari M.N.P. dahulu dengan golongan-golongan rakan-rakan mereka yang sekarang bercerai-cerai – ada di dalam parti *Socialist*, ada di dalam

Parti Rakyat dan di luar negeri dari Kesatuan Melayu
Muda? Zaman akan menjelaskannya dari setapak ke setapak.


* * *

Akhbar-akhbar dan wakil berita Indonesia membuat ribut bahawa tentera Inggeris dan Gurkha telah berkawal di sempadan Sarawak dan Indonesia sehingga menyusahkan orang-orang, barangkali orang-orang Indonesia, masuk ke Sarawak kerana membeli-belah dan membuat perniagaan. Dahulu, sememangnya benar banyak orang-orang Indonesia masuk ke daerah Sarawak dengan cara haram kerana membeli

barang-barang keperluan mereka sebab di Indonesia keperluan mereka tidak diselenggarakan oleh negara terutamanya di daerah-daerah Kalimantan Barat. Apakah akhbar Indonesia berfikir bahawa sempadan mereka dibukakan semau-maunya sahaja. Kalau dahulu diluluskan tentunya kerana belum ada kejahatan tetapi sekarang orang kenal bagaimana mereka, golongan-golongan yang tidak dikehendaki menyeludup ke Sarawak yang bertujuan mengacau keamanan negeri ini.

* * *

Syarikat berita Antara Indonesia telah menyiarkan satu berita bahawa Dr. Sumitro, ahli ekonomi



Gambar ketua-ketua murid Maahad Muhammadi tahun 1962, di sebuah sekolah agama menengah tinggi di negeri Kelantan, kerana mengucapkan selamat berpisah kepada Yang Dipertuanya Uthman Abdul Qadir yang telah diterima memasuki kursus mubaligh di Kuala Lumpur.

Duduk dari kanan: Ibrahim Mat, Salih Awang Chik, Jaafar Yasin, Zakaria Mahmud (Naib Yang Dipertua),

Abdul Salam Zulkifli Hasan (Setiausaha), Abdul Kadir Abdul Rahman dan Idris. Berdiri dari kanan:

Nik Yahya Nik Mat, Taib, Ghazali, Abdullah, Uthman Abdul Kadir (Yang Dipertuanya, yang mana akan berlatih menjadi mubaligh) Muhammad Sahir, Abdul Wahab, Wan Abdullah, Wan Daud, Muhammad Daud dan Husin Abdullah.

- Kiriman Ibnul Husain.

Indonesia, seorang bekas pemimpin Indonesia kononnya menjadi penasihat peribadi Tengku Abdul Rahman. Tengku menafikan sekeras-kerasnya dan menyatakan bahawa beliau tidak pernah pun berjumpa dengan Dr. Sumitro.

Siapakah Dr. Sumitro? Mari kita bawa satu kisah yang kononnya terjadi di istana Sukarno di Bogor Indonesia. Dikisahkan oleh yang empunya citra bahawa Sukarno mengajak Dr. Limina tidur di istananya kerana bercakap-cakap. Sesudah makan malam berbual-buallah kedua-duanya. Sukarno bertanya fikiran Dr. Limina untuk mengatasi keburukan ekonomi Indonesia. Siapakah orangnya yang layak untuk memimpin ekonomi, Sukarno bertanya.

“Ada”, jawab Limina.

“Saya tidak mau sebut siapa namanya, nanti saudara marah.” Kata Limina pula.

“Tidak! Saya tidak marah! Sebutkan sahaja, saya tidak marah. Tidakkah ini hanya bertukar-tukar fikiran sahaja”, kata Sukarno yang makin hendak tahu siapa orangnya.

“Betul saudara tidak marah”, kata Limina lagi.

“Betul! Saya tidak marah!” kata Sukarno.

“Kalau betul tidak marah saya sebutkan! Orangnya yang layak ialah Sumitro!”

Terdengar sahaja nama Sumitro, maka Sukarno meradang lalu menumbuk meja dan memaki hamun Sumitro. Demikianlah dikisahkan oleh yang empunya citra itu.

* * *

Kisah Sumitro itu ada pula pertaliannya kemudiannya. Dikisahkan Sukarno dan kakitangannya telah datang mencari Sumitro. Khabarnya mereka datang ke Malaya, ke Hong Kong dan ke Tokyo. Sumitro dicari untuk diminta bekerja menyelenggarakan ekonomi Indonesia. Rupanya Sukarno berhajat tenaga Sumitro sekarang. Tetapi adakah Sumitro mau?

Sumitro dapat dijumpai mereka. Sumitro sebarnya¹ mau memberi tenaganya untuk negara Indonesia tetapi dengan kuasa penuh. Maukah Sukarno? Jawabnya tidak, sebab takkan Sukarno mau memberi kuasa penuh keadaan kewangan sebab kelak payah mau menggunakan wang untuk ke mana-mana. Ya ke mana-mana makan angin, kan.

* * *

A. Latif bin Kamal berumur 55 tahun dan keluarganya telah dihukum denda kerana melakukan istiadat nikah anaknya sendiri dengan tidak memakai jurunikh yang dilantik oleh kerajaan. A. Latif tidak mengaku salah kerana ia berpendapat bahawa ia diberi hak oleh syarak untuk menikahkan anaknya sedang nikah itu sah. Ia tidak mau membayar denda dan kerana itu ia terpaksa dipenjarakan.

Pendapatan A. Latif itu, menurut ahlinya, adalah benar. Syarak meluluskan seorang bapa menikahkan anaknya sendiri dan nikahnya sah. Yang dilanggarnya adalah hukuman negeri yang mentadbir supaya jangan ada orang yang berlaku dua ataupun lain-lainnya yang mengkucar-kacirkan hal ehwal perkelamian². Hanya ada satu perkara yang menjadi pertanyaan, adakah syarak meluluskan sesuatu perbuatan yang baik atau orang yang membuat kebaikan dijatuhkan hukuman atasnya? Alim ulama Kelantan yang mengadakan undang-undang itu wajib memerhati hal ini dan mencari jalan sebaik-baiknya untuk keluar daripadanya.

* * *

Kerajaan Indonesia meminta rakyatnya memberi fikiran untuk mengatur negerinya, terutama dalam perkara ekonominya. Fikiran apakah yang dicari kepada awam! Sedangkan fikiran pakar ekonomi Jerman, Tuan Schacht, tidak diterima apalagi fikiran rakyat Indonesia. Begitulah keadaan Indonesia selagi Sukarno memerintah semuanya hanya untuk main-main mata sahaja.

¹ Perkataan sebenar ialah sebenarnya.

² Perkataan sebenar ialah perkelaminan.

Bukan sedikit pula kita jumpai mereka itu yang bermandikan ayat dan hadith, menggerakkan umat dengan tenaga parti untuk menentung¹ sesuatu yang hak yang menyenggung partinya dan anggota-anggotanya.

Peribadi yang hanya mencintai sesuatu kerana Allah (kerana benar) dan membenci sesuatu kerana Allah (kerana berlawan dengan keredaan Allah), sentiasa melihat jauh ke hadapan; sentiasa memanjangkan fikiran di dalam masa yang perlu mengambil sesuatu langkah. Peribadi ini selalu mencari keredaan Tuhan! Ia sentiasa berharap kepada hidayah Allah.

Seterusnya, selama manusia itu mengutamakan keredaan atas kepentingan diri dan parti, selama itulah manusia tidak mewujudkan budi “cinta dan benci kerana Allah” seperti yang dikehendaki oleh Allah.


Menurut keadaan yang terang dan nyata, bahawa umat

sekarang dipengaruhi sangat oleh kebendaan, baik mereka dengan tegas-tegas memasuki golongan yang memperjuangkan kebendaan itu ataupun mereka yang menamakan diri mereka pejuang yang *idealist*. Kerana itu, banyaklah mereka yang menyertai kebenaran,, menyeru manusia kepada kebenaran, kerana dengan demikian akan terbuka pintu naik dan maju kepadanya. Ada pula sebaliknya, manusia yang membela kebatilan dengan segala daya upaya, halal atau haram, kerana dengan demikian ia perlu untuknya bagi mendapat nikmat dan kesedapan.

Bilakah agaknya akan dapat menghidupkan semula “budi cinta dan benci kerana Allah” ke dalam jiwanya untuk kebaikan umat dan agama Islam.

(Dipersesuaikan dari kitab “*al-Islām*”

karangan Kiyai Muhammad Hasbi Ash-Shiddieqy).



Sebuah masjid yang indah sebagai lambang perjuangan Islam.

¹ Perkataan sebenar ialah menentu.